

Na osnovu čl. 8, 9. i 11. Zakona o statistici Bosne i Hercegovine („Službeni glasnik BiH“, broj 26/04 i 42/04) i člana 68. Zakona o Centralnoj banci Bosne i Hercegovine („Službeni glasnik BiH“, broj: 1/97,29/02,8/03,13/03,14/03,9/05,76/06 i 32/07)

AGENCIJA ZA STATISTIKU BOSNE I HERCEGOVINE, koju zastupa direktorica Vesna Ćužić

i

CENTRALNA BANKA BOSNE I HERCEGOVINE, koju zastupa guvernerka dr. Jasmina Selimović

zaključuju sljedeći:

MEMORANDUM O SARADNJI NA PODRUČJU STATISTIKE VLADINIH FINANSIJA

Član 1.

Predmet Memoranduma

Predmet Memoranduma o saradnji na području statistike državnih finansija (u daljnjem tekstu: Memorandum) je uspostava kontinuirane saradnje između Agencije za statistiku Bosne i Hercegovine (u daljnjem tekstu: BHAS) i Centralne banke Bosne i Hercegovine (u daljnjem tekstu: CBBiH) u području Statistike vladinih finansija, prvenstveno u skladu s regulativama Evropske unije.

Potpisom Memoranduma potpisnici iskazuju svoju spremnost za uspostavljanjem visokokvalitetnog, održivog i racionalnog statističkog sistema na području Statistike vladinih finansija i Procedura prekomjernog deficita (u daljnjem tekstu: GFS i EDP) baziranih na statističkoj metodologiji definisanoj na nivou Evropske unije (u daljnjem tekstu: EU) i na principima Kodeksa prakse evropske statistike (European statistics code of practice).

Član 2.

Svrha Memoranduma

1. Osnovna svrha Memoranduma je definisati podjelu odgovornosti i obaveza u području GFS i EDP statistike za svakog pojedinačnog potpisnika Memoranduma.
2. Osigurati visoke standarde kvaliteta statističkih podataka o dugu i deficitu sektora opšte države kao i njenih podsektora.
3. Osigurati kontinuirani rad na razvoju, racionalizaciji i povećanju efikasnosti sistema kompilacije predmetnih statistika.
4. Definirati područja i modalitete međusobne saradnje potpisnika Memoranduma.
5. Promovirati službeni statistiku u datoj oblasti i koordinirati nastup prema drugim institucijama.
6. Utvrditi praksu učestvovanja u inostranim radnim grupama, dijaloškim posjetama Evropske komisije (tj. Eurostata) kao i pravila razmjene informacija i znanja iz predmetnog područja.

7. Provoditi proces usklađivanja i pregovaranja sa EU za datu oblast.

8. Usklađeno nastupati vezano za programiranje i provođenje tehničke pomoći različitih institucija.

Član 3.

Podjela odgovornosti

A. Sektorska klasifikacija institucionalnih jedinica u BiH

BHAS je odgovorna za metodološki osnov te donošenje odluke o sektorskoj klasifikaciji institucionalnih jedinica u BiH, kao i njeno redovno ažuriranje, u skladu s ESA 2010 metodologijom kao osnovnog preduslova za kompilaciju GFS, EDP i ostalog skupa statistika iz domena nacionalnih računa.

Podaci o sektorskoj klasifikaciji vode se u statističkom poslovnom registru BHAS.

CBBiH ima savjetodavnu ulogu u pogledu metodološko-tehničkih pitanja u procesu sektorske klasifikacije institucionalnih jedinica u BiH.

BHAS je odgovorna za pravovremenu, koordiniranu i tačnu nacionalnu objavu službene sektorizacije institucionalnih jedinica u skladu s ESA 2010.

BHAS osigurava CBBiH pristup bazi sektorske klasifikacije na kontinuiranom osnovu, s tim da je obavezna kontinuirano dostavljati CBBiH listu jedinica uključenih u sektor opšte države, prema definisanom u Aneksu 1. koji je sastavio dio ovog Memoranduma.

B. Raspodjela odgovornosti u domenama GFS-a i EDPS-a

Ovim Memorandumom utvrđuje se raspodjela odgovornosti za proizvodnju definisanih statističkih tabela iz domena GFS i EDP statistike.

B.1 Raspodjela odgovornosti

CBBiH je odgovorna za kompilaciju i redovnu transmisiju GFS i EDP tabela koje su definisane u skladu sa Aneksom 1. Memoranduma.

Aneks 1 Memoranduma sadrži listu izvještajnih tabela za potrebe Eurostata, Evropske centralne banke i Međunarodnog monetarnog fonda:

- EDP Aneks 1 - Izvještavanje o dugu i deficitu opšte države
- EDP Aneks 3 - Upitnik vezan za EDP notifikaciju (Aneks 1)
- EDP Aneks 5 - Dodatna tabela u vezi s transakcijama povezanim s finansijskom krizom
- EDP
- GFS Tabela 2 - Glavni agregati opšte vlade na godišnjem nivou
- GFS Tabela 9 - Detaljni primici po vrstama poreza i socijalnih doprinosa i podsektora primatelja
- GFS Tabela 9 - Detaljni primici po vrstama poreza i socijalnih doprinosa i podsektora primatelja
- GFS Tabela 25 - kvartalni nefinansijski računi opšte vlade
- GFS Tabela 27 - kvartalni finansijski računi opšte vlade
- GFS Tabela 28 - kvartalni Mastroški dug opšte vlade
- EDP Upitnik o strukturama duga opšte vlade na godišnjem nivou
- GFS ECB Statistika vladinih finansija za Evropsku centralnu banku
- GFS Statistika vladinih finansija za Međunarodni monetarni fond

Član 4.

Razmjena podataka između institucija u procesu kompilacije podataka

Potpisnici se obavezuju da će za ispunjavanje obaveza iz Memoranduma, na kontinuiranom osnovu, osigurati drugoj strani slobodno i besplatno raspolaganje vlastitim podacima (izvještajima i ostalim strukturama podataka).

Član 5.

Mehanizmi provedbe Memoranduma

Ovim Memorandumom osnivaju se dvije metodološko-ekspertne radne grupe na nivou Bosne i Hercegovine utvrđene u Aneksu 2. s ciljem unapređivanja postojećeg kvaliteta predmetnih statistika, optimizacije statističke proizvodnje te implementiranja novih metodoloških smjernica.

Aneks 2. je sastavni dio Memoranduma i sadrži spisak radnih grupa:

- Radna grupa za sektorsku klasifikaciju
- Radna grupa za GFS i EDP statistiku

Obje radne grupe uz stalne članove mogu na sastanke pozivati i predstavnike ostalih institucija te sarađivati s ostalim tijelima ukoliko je isto bitno za donošenje statističkih odluka iz predmetnih statistika.

Predsjednik radne grupe, članovi te modalitet donošenja odluka definisani su u Aneksu 2 ovog Memoranduma.

Radne grupe usvajaju Poslovnik kojim se uređuje organizacija, način rada i sastav radne grupe u skladu s Aneksom 2.

Član 6.

Osiguranje kontinuiranosti proizvodnje i kontinuiranog podizanja nivoa kvaliteta statističkih pokazatelja

Potpisnici Memoranduma pristaju da će u najboljoj vjeri kontinuirano zajednički raditi na:

- a) daljnjem razvoju i unapređivanju struktura i sadržaja izvora podataka te sistema za kompilaciju predmetnih statistika;
- b) unapređivanju saradnje s institucijama koje definišu računovodstvena pravila i sisteme izvještavanja jedinica (vlasnici podataka) koje su u skladu s ESA 2010 klasificirane u sektoru opšte države;
- c) minimiziranju operativnog rizika u smislu formalnog obvezivanja vlasnika podataka na dostavu finansijskih izvještaja i drugih podataka bitnih za GFS i EDP statistiku;
- d) daljnjem razvoju i unapređivanju IT rješenja u svrhu optimizacije procesa manipuliranja nad izvorima podataka, nad bazom sektorske klasifikacije institucionalnih jedinica te procesa kompilacija predmetnih statistika;
- e) razmatranju mogućeg uvezivanja postojećih i budućih baza podataka u svrhu transparentnijeg i kvalitetnijeg rada na kompilaciji predmetnih statistika;

f) dobivanju i razmjeni svih ulaznih podataka koji se potencijalno nalaze u ostalim dijelovima statističkog sistema BiH;

g) definisanju planova i aktivnosti u planskim dokumentima.

Član 7.

Osiguravanje konzistentnosti među povezanim statistikama

CBBiH se obvezuje da će u procesu kompilacije podataka osiguravati konzistentnost ESA 2010 tabela iz transmisijskog programa (GFS) i EDP statistike iz svog opsega odgovornosti.

CBBiH se obvezuje da će na vrijeme informisati kompilatore finansijskih računa ostalih sektora o svim bitnim zaključcima radnih grupa osnovanih ovim Memorandumom.

BHAS se obvezuje na vrijeme informirati kompilatore nefinansijskih računa ostalih sektora o svim bitnim zaključcima radnih grupa osnovanih ovim Memorandumom.

Član 8.

Zaštita i povjerljivost podataka

Potpisnici Memoranduma će osigurati sve preduslove za poštovanje načela statističke povjerljivosti i provesti sve administrativne, tehničke i organizacione mjere za zaštitu sigurnosti i integriteta statističkih podataka u procesima proizvodnje i njihove razmjene, u skladu s najboljim praksama, međunarodnim standardima, kao i evropskim i nacionalnim zakonodavstvom.

Član 9.

Izmjene i dopune Memoranduma

Ovaj Memorandum usklađivat će se s promjenama u bitnim elementima za obavljanje predmeta ovog Memoranduma.

Bilo koji potpisnik Memoranduma ima pravo pokrenuti proces izmjena i/ili dopuna Memoranduma, gdje je za provođenje izmjena i/ili dopuna potreban ponovni potpis najvećih rukovodećih nivoa oba potpisnika.

Svi aneksi su sastavni dio ovog Memoranduma.

Za utvrđivanje prijedloga izmjena i/ili dopuna ovog Memoranduma i aneksa ovlašćuje se Radna grupa za GFS i EDP statistiku. Predložene izmjene i/ili dopune Aneksa usvajaju se od strane rukovodioca institucija BHAS i CBBiH.

Član 10.

Završne odredbe

Ovaj Memorandum potpisuje se u 2 (dva) istovjetna primjerka i na neograničeno vrijeme.

Memorandum stupa na snagu s danom potpisa Memoranduma od strane koja ga je posljednja potpisala.

Stupanjem na snagu ovog Memoranduma prestaje da važi Memorandum o saradnji broj 01-14-4-186-1-1/21 i 114-03-4-2098-1/21 od 21.10.2021.

Oba potpisnika dužna su Memorandum javno objaviti na svojim internetskim stranicama.

ZA AGENCIJU ZA STATISTIKU BOSNE I HERCEGOVINE

DIREKTORICA

Vesna Čužić

Broj: 09-06-1-235-1/26

Sarajevo, 26.02.2026



ZA CENTRALNU BANKU BOSNE I HERCEGOVINE

GUVERNERKA:

dr. Jasmina Selimović

Broj: 114-07-1-464-1/26

Sarajevo, 26.02.2026

